

Sèks ta Bon!

Tempu ku hopi di nos a lamta, un silensio mortal a reina pa ku e tópiko di seksualidat. Komo resultado, hopi hende a lamta ku e pensamentu ku sèks ta un tópiko ku mester keda kubrí den skuridat, un tópiko tabu, muchu intimo pa papia Ku bèrgwensa mayornan a papia di "e kos" na lugá di usa palabranan korekto.

Misa tambe a multipliká e sekresia. Predikashinan ku a "grabatá unda ta kishikí" riba e tópiko aki, tabata sumamente skars. Pastornan ku a menshoná seksualidat a blos i hasi tur klase di maniobra vèrbal pa evitá di papia muchu kla. Resultado di e sermonnan sensurá tabata ku hopi hende no a haña kontesta pa nan preguntanan, òf pió a yega na konklushonnan inkorekto òf asta destruktiv

Ku e eksploshon di informashon tokante seksualidat awendia, e tópiko tabú ta papiá na un forma eksplísito riba kaya, na trabou, na skol, na televishon, dilanti hues, den músika...kasi tur kamina. Tur kamina, ku eksepshon di nèt e lugánan unda ta mas importante pa papi'é: na kas i iglesia. Komo resultado, hopi hende ta kana ku un impreshon kiboká. Nan ta kere ku un denunsia di sèks tras di otro ta yena e páginanan di Beibel; ku Dios tin un rabia riba tur relashon seksual. Ma e idea ei ta leu di bèrdat! Ta tempu pa nos proklamá na bos haltu pa tur hende sa: **SEGUN DIOS, SEKS TA BON!**

Pa algun hende un deklarashon asina ta sakrilegio i blasfemoso, kousando un atake di kurason formal! Ma echu ta ku e mensahe aki ta resoná kla den e páginanan di santu Skritura. Ripará sinku punto importante tumá for di Beibel!

Nos tin ku realisá ku e idea di sèks a orginá ku **^SDios mes^S!** DIOS por a hende kualke manera ku E tabata ke, i El a skohe pa krea hende komo sernan seksual! "Segun imagen di Dios El a krea hende. El a krea nan hòMBER i muhé" (Génesis 1:27). Sèks ta DIOS Su invenshon! (1) Dios a krea dos sekso distinto

Tambe nota ku maske Dios por a krea e órganonan seksual kualke manera òf forma ku E tabata ke, El a skohe pa krea esakinan distinto ma di tal forma ku (2) nan por armonisá ku otro. Esei tambe tabata **^SDios^S** Su idea!

Ma esei no ta tur! (3) Dios a pone den tur dos sekso e deseo pa uni ku otro. Despues di adolesensia, mayoria hende ta anhelá pa relashon seksual. E deseo ei no ta piká. Dios ta Esun ku a krea e deseo ei den hende. Sin e deseo aki, mundu lo tabatin un problema ku poblashon...un skarsedat enorme.

Dios asta (4) a DUNA ORDU pa e hòMBER i muhé uni huntu. Despues di kreashon, Dios a bisa Adam i Eva: "Sea fruktífero i multipliká, yena mundu..." (Génesis 1:28). Ma relashon seksual no ta un mandamentu solamente pa e proposito pa hende haña yu. Dios a krea sèks pa plaser! "Alegrábo den e esposa di bo hubentut...laga su pechunan satisfasébo tur ora; sea enkantá sèmper ku su amor" (Provèrbionan 5:18-19). Ku esaki en bista, ta notábel ku I Korintionan 7:1-5 ta kita tur duda ku relashon seksual ta Dios Su MANDAMENTU pa hende kasá. "Esposo lo kumpli ku su deber di matrimonio ku su esposa, i igualmente e esposa ku su esposo...NO APSTENE BOSO DI OTRO..." Dios nunca ta duna un mandamentu pa hasi algu ku no ta bon.

Ma e Dios ku e krea dos sekso distinto ku ta armonisá ku otro, i a pone den nan e deseo pa uni ku otro, i asta a duna mandamentu pa nan hasi esei, e mésun Dios aki—sabiendo loke ta lo mihó pa hende—a duna mandamentu bon kla pa (5) relashon seksual keda SOLAMENTE DEN MATRIMONIO! "Laga bida kasá sea respetá pa tur i kama (relashon seksual) sin mancha; ma fornikadónan (kualke akto inmoral) i kibradónan di matrimonio (adulteronan) Dios lo husga nan" (Hebreonan 13:4). TUR relashon seksual fuera di matrimonio ta piká: homoseksualidat, bi-seksualidat, sèks prematrimonial, bibamentu, adulterio, incestu, bestialidat, èts. Laga nos kita tur idea kiboká for di nos kabes. Beibel ta deklará bon kla ku sèks fuera di matrimonio ta piká. Ma e mésun Skritura santu tambe ta laga sa enfátikamente ku sèks ta Dios Su idea i invenshon, ku sèks ta plasentero, ku sèks ta dushi, ku sèks ta santu, ku den matrimonio, sèks ta bon!